



ЗЕРДЕ

ЕСКЕРТКІШ – ТАРИХ КУӘСІ**«Өткен күндерді еске алайық...» атты іс-шара басталды**

18 сәуір – Халықаралық тарихи орындар мен ескерткіштер күні. Атаулы күнді 1982 жылы ЮНЕСКО жанынан құрылған Халықаралық ескерткіштер мен көрнекі орындарды қорғау мәселелері жөніндегі кеңес ассамблеясы бекіткен.

**Айжан БҮРКІТБАЕВА**

Аталмыш мерекеге орай Алмалы ауданы аумағындағы ескерткіштер мен тарихи орындар маңында жазушылар, журналистер, қоғам қайраткерлері, ЖОО студенттері, аудан мектептерінің оқушыларының қатысуымен «Есте сақтаймыз, құрметтейміз» және «Өткен күндерді еске алайық...» атты іс-шара бастау алды.

Сонымен қатар, ауданда Ардагерлер кеңесі мен мектептерінің ұйымдастыруымен ескерткіштерге гүл шоқтарын қою, әдеби-көркем оқулары мен шығармаларын оқу, өмірбаяны мен қызмет жолы деректеріне шолу, викториналық сұрақ-жауап сынды іс-шаралар Мұхтар Әуезов, Ә.Молдағұлова және М.Мәметова ескерткіштерінің алдында және басқа да аудан ма-



ңында орналасқан тарихымыздың әртүрлі кезеңдерінен сақталған тарихи-мәдени ескерткіш-бюсттері мен орындарында өткізілді.

Жалпы, Алмалы ауданы аумағына қа-

расты жерде 54 тарихи-мәдени ескерткіштер орналасқан. Оның ішінде 12 ескерткіш республикалық маңызы бар нысан қатарына енсе, қалған 42 ескерткіш қалалық маңызы бар ескерткіштер тізімінде.

Суретті түсірген Самат СЕРІКБАЙҰЛЫ.

ТАҚЫРЫПҚА ОРАЙ

Людмила ЕРМИЛОВА,
Алмалы аудандық Ардагерлер кеңесінің мүшесі:

– Бұл шара 2018 жылдан бері ауданымызда жыл сайын өткізіліп тұрады. Тек пандемиялық шектеулерге байланысты екі жыл шегерілген болатын. Іс-шара аясында оқушылар ескерткіштерге гүл шоқтарын тапсырып қана қоймай, ауданды таза ұстау сынды игілікті істермен де айналысады.

Әсем ХАСЕНҚЫЗЫ,
Алмалы ауданы әкімшілігінің мәдениет және тілдерді дамыту бөлімінің бас маманы:

– Өткізіліп жатқан шараның басты мақсаты – оқушыларға ескерткіштерді құрметтеуге шақыру, белді тұлғалардың өмір жолдары, шығармашылықтарымен таныстыру. Бұл іс-шарада оқушылар өздері жаттаған өлеңдерін айтып, танымал тұлғалардың шығармашылығынан бір туындыны көпшілікке ұсынады.

Ескерткіштерге гүл шоқтарын қою шарасы аясында Мұхтар Әуезов театрының актерлері оқушыларға «Абай жұмбағы» көрінісін қойып, жас дарындарға ізгі-тілектерін жеткізді.

«Есте сақтаймыз, құрметтейміз» және «Өткен күндерді еске алайық...» атты іс-шараға Қазақстанның еңбек сіңірген қайраткері – Болат Әбділманов (Абай рөлінде), ҚР мәдениет қайраткері – Шынар Асқарова (Абайдың жары Әйгерім рөлінде), талантты актерлер Мейрамбек Тағанов (Абайдың жас кезі), Алмас Шахметов (Абайдың ұлы Айдар) атсалысты.

«IT FEST 2022»

КРЕАТИВТІ ИДЕЯЛАР АЛАҢЫ**Өз жобаларыңызды ұсынуға, жүзеге асыруға және қаржылық қолдау алуға берілген керемет мүмкіндік!**

Кеше Алматыда Халықаралық ақпараттық технологиялар университетінің (ХАТУ) ауқымды IT FEST 2022 фестивалі ашылды.

Қазақстан Республикасы Білім және ғылым министрлігі мен Алматы қаласы әкімдігінің қолдауымен ұйымдастырылып отырған бұл шараға негізінен студенттер мен жас ғалымдар қатысады. Еліміз бойынша бастауын сонау 2011 жылдан алатын бұл байқауда бақ сынауға биыл мектеп оқушылары, сонымен қатар, жоғарғы технологияға қызығушылық танытатын қала тұрғындары да жұмылып отыр.

Фестиваль бағдарламасы ақпараттық технологиялар, киберқауіпсіздік, дизайн және анимация, кино және бейнетүсірілім, дайын шешімдер мен киберспорт сияқты салалардағы ірі іс-шаралар мен кездесулерді қамтиды. Бұл – IT саласындағы жаңа нәрселерді үйренуге, пікірлер мен серіктестер табуға ғана бағытталып қоймай, сонымен қатар, өз идеяларыңыз бен жобаларыңызды ұсынуға, ең бастысы, оларды жүзеге асыру үшін қаржылық қолдау алуға берілген керемет мүмкіндік. Фестивальдің жалпы жүлде қоры – 6 миллион теңге.

«IT FEST 2022» – креативті және шығармашылық алаң, жетекші IT-компаниялардың өкілдерімен және сарапшыларымен кездесулер, жоғары білікті мамандардың кеңестері, шеберлік сабақтары мен таныстырылымдар, команда құрудың немесе қызықты жобаға қосылудың нақты мүмкіндіктері. Қызықты жобаларды ұсынған фестивальдің ең бастамашыл және белсенді қатысушылары ХАТУ-да білім алуға жеңілдіктер, гранттар және арнайы сертификаттар ала алады.

Төрт күнге созылатын фестивальдің беташары Алматыдағы Республикалық физика-математика мектебінде өтті. Фестивальге қатысушылар ақпараттық технологиялар, киберқауіпсіздік, дизайн, анимация, кино, видео, дайын шешімдер мен киберспорт салалары бойынша өз мүмкіншіліктерін көрсетіп қана қоймай, өзіндік озық іс-тәжірибелерін де ортаға салуды жоспарлап отыр. Аталмыш фестивальдің өзіндік ерекшеліктерімен қатар, пайдалы тұстары да жетерлік. Мәселен,

шараға қатысушылардың IT саласындағы таңдаулы, ұтымды да ұтқыр тың жобалары мен идеяларына қажетті қолдау көрсетілетін болады. Жоғарыда атап өткеніміздей, оларды іс жүзіне асыруға қаржылық көмек көрсетілімек.

Фестивальдің салтанатты ашылуында Халықаралық ақпараттық технологиялар университетінің ректоры Асқар Хикметов сөз алды.

– Алғаш рет 2011 жылы фестиваль HackDay деген атпен өтіп, оған 400 адам ғана қатысса, келесі жылы қатысушылар саны үш мыңға жеткен еді. Мұның өзі бұл салаға деген қызығушылықтың артып келе жатқанын көрсетеді. Байқауды Қызылорда қаласында да өткізіп қайтқан едік. Сонымен қатар, біз карантин кезінде де байқауды тоқтатпай, онлайн түрде өткіздік. Дәл қазір елімізде роботтық техниканы дамытуды жан-жақты қолға алып жатыр. Бұл ретте Білім министрлігі роботтық техниканы бастауыш сыныптан бастап оқу бағдарламасына енгізуді көздеп отырғаны, бұл саланың тамырына қан жүгіре бастағанын көрсетсе керек. Қазіргі таңда көптеген жоғары оқу орындары осы саланың арнайы мамандарын дайындай бастады. Мұның өзі жұмыстың жүйелі түрде қолға алынғанын көрсетеді. Биылғы жылы секциялар қатары көбейіп, форматы өзгерді.



Тіпті, байқау тәулік бойы жалғасады. Фестивальдің жалпы жүлде қоры 6 миллион теңгені құрайды. Сөз соңында айтарым, фестивальдің ең белсенді қатысушыларына біздің университетімізде білім алуға оқу жеңілдіктерін, арнайы грант пен сертификаттарды жеңіп алуларына болады, – деді Асқар Құсұпбекұлы.

Фестиваль аясында роботтық техника бойынша жүлде қоры 1 миллион теңгені құрайтын «ITU ROBOCON 2022» респуб-

ликалық олимпиадасы өткізіледі. Роботтық техника чемпионаты Vex платформасы негізінде студенттер мен мектеп командалары арасында өткізіледі.

Бұл олимпиада – дарынды жастарды қолдауға және оларды роботтық техника және инновациялық технологиялар саласына тартуға бағытталған шара.

Ж.СЕЙТЖАНОВА,
ХАТУ-дың ассистент-профессоры.

